

CONVENIO MARCO DE COLABORACIÓN ENTRE O SERVIZO GALEGO DE SAÚDE E A ASOCIACIÓN DE FAMILIARES DE ENFERMOS DE ALZHEIMER E OUTRAS DEMENCIAS DE LUGO PARA O DESENVOLVEMENTO DE ACCIÓNS CONXUNTAS EN PROL DAS PERSOAS CON DEMENCIA, ASÍ COMO DO SEU ENTORNO FAMILIAR E CONVIVENCIAL

En Lugo, a 26 de febreiro de 2020

REUNIDOS

Dunha parte, Don Jesús Vázquez Almuiña, conselleiro de Sanidade e presidente do Servizo Galego de Saúde, nomeado por Decreto 125/2015, de 4 de outubro (DOG núm. 190, de 5 de outubro de 2015), de acordo co establecido no artigo 34 da Lei 1/1983, de 22 de febreiro, de normas reguladoras da Xunta e da súa Presidencia, e de conformidade cos Decretos 136/2019 e 137/2019, de 10 de outubro, polos que se establecen as estruturas orgánicas da Consellería de Sanidade e do Servizo Galego de Saúde, e co establecido na Lei 1/2016, de 18 de xaneiro, de transparencia e bo goberno, así como na Lei 40/2015, do 1 de outubro, do réxime xurídico do sector público.

Doutra parte, Dona María Carmen Pena Ledo, en calidade de presidenta da Xunta Directiva da Asociación de Familiares de Enfermos de Alzhéimer e outras Demencias de Lugo, en adiante, "**AFALU**", e en nome e representación da mesma, asociación privada, non gobernamental, sen fins lucrativos, considerada de utilidade pública, inscrita no Rexistro Autonómico de Asociacións da Xunta de Galicia co número 2019-23435-1 (27/06/2019) e en virtude das competencias que lle confire o art. 14 dos Estatutos da Asociación, con domicilio na Avda. Infanta Elena, 11 (Casa Clara Campoamor, local 8), código postal 27003, Lugo e CIF G-27285980.

Ámbalas partes recoñécense entre si capacidade xurídica suficiente para outorgar o presente Convenio, e para estes efectos,

EXPOÑEN

- I. Que, de conformidade co previsto no artigo 92 da Lei 8/2008, de 10 de xullo, de Saúde de Galicia, o Servizo Galego de Saúde configúrase como organismo autónomo de natureza administrativa adscrito á Consellería de Sanidade, creado pola Lei 1/1989, de 2 de xaneiro, con personalidade xurídica propia e plena capacidade para o idóneo desenvolvemento das competencias que no ámbito sanitario lle corresponden á Comunidade Autónoma de Galicia.



- II. AFALU é unha entidade sen ánimo de lucro constituída ao abeiro da Lei Orgánica 1/2002, de 22 de marzo, reguladora do dereito de asociación, debidamente inscrita nos Rexistros nacional e autonómico de asociacións e declarada igualmente de utilidade pública.
- III. Que de conformidade coa súa norma estatutaria, son fins da referida Asociación, entre outros, levar a cabo unha serie de actividades destinadas a mellorar a calidade de vida das persoas con alzheimer e outras demencias, así como do seu entorno familiar e convivencial.
- IV. O Servizo Galego de Saúde e AFALU están interesados en desenvolver liñas de traballo conxunto na área sanitaria de Lugo que redunden positivamente na atención a persoas con demencia, así como nos seus familiares e achegados.

Que á vista do exposto, ambas partes asinantes coinciden na conveniencia de afianzar esta alianza nunha colaboración de longo alcance, acordando unir esforzos co gallo de alcanzar o obxectivo sinalado, polo que formalizan o presente convenio marco de colaboración de acordo coas seguintes

CLÁUSULAS

1. OBXECTO

O presente convenio marco ten por obxecto establecer as bases da colaboración entre o Servizo Galego de Saúde e AFALU para o desenvolvemento de accións conxuntas en prol das persoas con demencia, así como do seu entorno familiar e convivencial.

2. ALCANCE -

É propósito deste convenio realizar actividades e proxectos de colaboración en asuntos que resulten de interese na área sanitaria de Lugo para as institucións que representan, entre os cales enunciados, pero non limitados , menciónanse os seguintes:

- a. Posta en marcha de campañas de formación comunitaria dirixidas ao diagnóstico precoz.
- b. Programación de actividades psicoeducativas para coidadores non formais (entorno familiar e convivencial) de persoas con demencia.
- c. Participación en obradoiros e conferencias de natureza divulgativa.
- d. Difusión de información de interese común a través dos soportes de comunicación dos que dispoñen as partes asinantes nos centros dependentes da- área sanitaria de Lugo.
- e. Cesión puntual de espazos para o desenvolvemento de proxectos piloto de atención ás persoas con demencia e o seu entorno familiar e convivencial nos centros dependentes da área sanitaria de Lugo.



- f. Intercambio e colaboración en todo tipo de proxectos de interese común.

3. DESENVOLVEMENTO.

Para a materialización dos proxectos en desenvolvemento do obxecto deste convenio, no marco das súas disponibilidades orzamentarias, deberán asinarse acordos ou convenios específicos de colaboración, unha vez obtidas as aprobacións internas pertinentes que cada parte poida precisar para cada proxecto, nos que se recollerán como mínimo, os seguintes aspectos:

a) Obxecto e aspectos técnicos dos proxectos.

b) Aspectos xurídicos, temporais e de vixencia dos mesmos.

c) Réxime das obrigacións económicas, no seu caso, de cada convenio, que non poderán comprometer ao Servizo Galego de Saúde en ningún caso."

4. OBRIGAS DAS PARTES

AFALU e o Servizo Galego de Saúde comprométense a colaborar activamente no desenvolvemento das accións de colaboración enunciadas na cláusula precedente, dando publicidade ás mesmas e implicándose nas reunións de coordinación que se convoquen por ambas partes.

5. FINANCIAMENTO

Este convenio de colaboración non establece obrigas ou compromisos de carácter económico entre as partes asinantes e, en consecuencia, non precisa consignación orzamentaria.

6. DIVULGACIÓN

Os actos relativos á información e comunicación das diversas actuacións realizadas ao amparo do presente convenio, así como os termos nos que se fará pública esta colaboración estableceranse e autorizaranse polo Servizo Galego de Saúde e por AFALU de forma conxunta, comprometéndose a efectuar aquelas accións de promoción e divulgación acordadas, co gallo de dar a coñecer esta colaboración.

En todo caso, o uso e emprego da imaxe corporativa institucional da Xunta de Galicia, da Consellería de Sanidade ou do Servizo Galego de Saúde, deberá respectar o disposto no Decreto 409/2009, de 5 de novembro, polo que se aproba o uso dos elementos básicos de identidade corporativa da Xunta de Galicia e na Orde, de 17 de abril de 2007, pola que se establecen o símbolo, o logotipo e o manual de identidade corporativa do Servizo Galego de Saúde.



7. COMISIÓN DE SEGUIMIENTO

Constituirase unha comisión de seguimento que interprete e asegure o bo fin e cumprimento do obxecto deste convenio e que resolva as controversias que poidan xurdir na súa execución.

A comisión estará formada por dous representantes de cada unha das partes, nomeados polos seus máximos responsables.

A comisión reunirse pola solicitude dunha das partes asinantes, considerándose constituída se asiste polo menos un dos representantes de cada entidade.

Serán en todo caso funcións da comisión:

- Coordinar, asegurar e avaliar o cumprimento das actuacións contempladas no presente convenio.
- Resolver cantas dúbidas e discrepancias xurdan con respecto á interpretación e aplicación do convenio.
- Velar polo bo desenvolvemento de todas e cada unha das actividades mediante o seu seguimento e avaliación.

8. CAUSAS DE RESOLUCIÓN

Serán causas de resolución do presente convenio, ademais das previstas legalmente, as que se establecen a continuación:

- a. Incumprimento total ou parcial dalgunha das súas cláusulas.
- b. O mutuo acordo de ambas partes.
- c. A imposibilidade sobrevida, legal ou material, de cumprir os deberes derivados do obxecto do convenio.

A resolución do convenio por calquera das causas anteriormente sinaladas non afectará ao cumprimento das actuacións iniciadas.

9. INEXISTENCIA DE RELACIÓN LABORAL E OBRIGAS DO PROFESIONAL

A subscrición do convenio non suporá a existencia de relación laboral, contractual ou de calquera outro tipo entre o persoal da AFALU e o Servizo Galego de Saúde.

En ningún caso será responsabilidade da Administración, posibles danos ou perdas a consecuencia do desenvolvemento dos programas realizados ao abeiro deste convenio.



10. CONFIDENCIALIDADE E PROTECCIÓN DE DATOS

De conformidade co establecido na Lei Orgánica 3/2018, de 5 de decembro, de Protección de Datos Persoais e garantía dos dereitos dixitais, ambas partes comprométense a gardar a máis estrita confidencialidade respecto a calquera das informacións, datos e documentación de carácter persoal a que teñan acceso en virtude do presente convenio e o deber de gardalos, sen que poidan utilizalos para usos diferentes aos previstos no mesmo, e fan constar, de forma expresa, que velarán polo cumprimento da normativa de protección de datos persoais de aplicación en cada caso. Estes deberes subsistirán despois de finalizar as relacións entre ambas partes.

Cada unha das partes formará e informará adecuadamente ao persoal que deba ter acceso a dita información, obrigando o cumprimento do segredo profesional, incluso despois de finalizado o presente convenio, así como a preservación da información durante os períodos fixados na normativa vixente.

As partes deberán asegurarse de que a destrución dos soportes documentais e informáticos son realizados de forma controlada, respecto a toda aquela información considerada como non imprescindible, garantindo que os datos de carácter persoal destruídos non poidan ser posteriormente accedidos.

As partes comprométense, ademais, a non efectuar usos nin cesións de datos persoais recollidos na aplicación do presente convenio.

11. RÉXIME XURÍDICO

Este convenio ten carácter administrativo e queda fora do ámbito de aplicación do Lei 9/2017, de 8 de novembro, de Contratos do Sector Público, segundo dispón o seu artigo 6.2.

Non obstante, consonte co disposto no artigo 4 da devandita lei, ao presente convenio seranlle de aplicación os principios da norma indicada para a resolución das dúbidas e lagoas que puidesen presentarse para o seu efectivo cumprimento.

As partes comprométense a resolver de maneira amigable calquera desacordo que puidera xurdir no desenvolvemento do presente convenio. As cuestións litixiosas que poidan xurdir na interpretación ou no incumprimento das obrigas que se deriven do presente convenio, e que non poidan ser dirimidas pola Comisión de seguimento creada para tal efecto, quedarán sometidas á xurisdición contencioso administrativa, de conformidade coa Lei 29/1998, do 13 de xullo, reguladora da devandita xurisdición.

12. VIXENCIA

O presente convenio terá unha vixencia de catro anos contados dende o día seguinte ao da súa sinatura.



Con todo, as partes, de mutuo acordo, poderán acordar a súa prórroga anual, por un período de ata catro anos adicionais mediante a formalización do correspondente acordo de prórroga, que deberá ser subscrito cunha anterioridade de polo menos trinta días á data de vencemento do convenio.

Calquera dos termos do presente Convenio que, pola súa natureza, esténdanse máis aló da terminación do mesmo, permanecerá en vigor ata o seu cumprimento.

Por razóns de interese público, poderase suspender, en calquera momento a execución deste convenio.

13. PUBLICIDADE

A firma deste convenio leva implícito o consentimento expreso das persoas intervintes para que a Administración Pública autonómica galega poida facer públicos os datos de carácter persoal que figuren nel, e o resto das especificacións contidas no mesmo, de acordo co disposto na Lei 19/2013, de 9 de decembro, de transparencia, acceso á información pública e bo goberno, e na Lei galega 1/2016, de 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, de 20 de xullo, polo que se regula o Rexistro de Convenios da Xunta de Galicia.

En proba de conformidade con canto antecede, firman o presente convenio, por duplicado exemplar, en lugar e data sinalados no encabezamento.

O presidente do Servizo Galego de Saúde
(P.D. de data 24/02/2020)

O xerente do Área Sanitaria de Lugo,
A Mariña e Monforte de Lemos

Don Ramón Ares Rico



A presidenta de AFALU



Dona María Carmen Pena Ledo